


neriješen slučaj Šest godina traganja za ubicom Suzane Simikić

MAGAZIN BOSNE I HERCEGOVINE

start 122

hronika

17.04.2007. godina II broj 8 BESPLATNO



Šta policija može uraditi protiv nereda
na sportskim terenima

HULIGANI

u policijskim dosjeima

DR. HANA KORAĆ >
Policiji je
potrebna
podrška
institucija i
građana



KRIJUMČARENJE >
LJUDI
Preko
Bosne do
zvijezda



Policiji je **potrebna podrška** institucija i građana

Savjetnica kantonalnog ministra unutarnjih poslova, doktorica nauka Hana Korać jedini je penolog u Bosni i Hercegovini i jedan od rijetkih stručnjaka iz te oblasti na prostorima bivše Jugoslavije. U razgovoru za Hroniku 122 objašnjava zbog čega je bilo potrebno produžiti pritvorski period sa jedne na tri godine, kakvo je stanje u bh. pravosuđu, na koji način prilagoditi sistem kažnjavanja...

Koji je uzrok ovom pravom procvatu kriminala u našoj zemlji?

- Još uvijek je to propustljivost granica, mada se dosta toga promijenilo u pozitivnom smjeru. Pored toga, ovo je poratno vrijeme, socijalno-ekonomska situacija je nestabilna, puno mladih ljudi nije ni blizu rješavanja svoga statusa, nemaju obezbijeđenu osnovnu egzistenciju. Veliki je protok ljudi (sumnjivog statusa i porijekla) i roba, kojima je moto u životu *raditi što manje, zaraditi što više*. Nažalost, to je često omladini pozitivan primjer i putanja koju treba slijediti.

Stalno se govori o reformi pravosuđa a u toj oblasti situacija izgleda sve gora. Gdje je problem?

- Reforma ne samo pravosuđa, već i policije i zatvorskog sistema ovisi od struke i profesionalaca koji učestvuju u sprovedbi. Ne tako davno, na ovom prostoru su se događale strahote. Pravosudni sistem nije se razvijao, naprotiv, sigurno-sno-bezbjedonosno stanje, politička situacija je otežala uzlaznu liniju profesionalnog rada.

Šta je sa reorganizacijom sudova za prekršaje?

- Imenovanjem sudija za prekršaje reforma u ovom segmentu je završena. To je nešto sa čim kao građani ne možemo biti zadovoljni, jer s jedne strane smanjen je broj sudija za prekršaje, broj predmeta rapidno raste i naravno za očekivati je da veliki broj predmeta dobija i zastaru. S druge strane, razriješene sudije ne rade, primaju platu iz budžeta... Ipak, ohrabruju naznake pozitivnih rješenja.

Šta se može uraditi sa tim razriješenim sudijama?



Korać: Nužna sprovedba državne strategije pravosuđa

- Tu se radi o diplomiranim pravnicima sa položenim pravosudnim ispitom, odnosno o dugogodišnjim sudijama za prekršaje, koji su po svim procjenama upotrebljivi za obavljanje poslova u ministarstvima, organima lokalne samouprave, inspekcijским službama, agencijama koje rade na sprovedbi zakona...

Kako biste ocijenili rad policije u BiH?

- Sve češće se u javnosti čuju pohvale na rad policije, svih agencija u BiH. Sve više se vraća povjerenje građana u policiju, što je posebno značajno ako se ima u vidu da smo tradicionalno poštivali policiju, odnosno svoju državu. Uglavnom, kada građani vrijeđaju policajce na ulici oni tako iskazuju revolt prema težini života u državi i sistemu koji ih nije zaštitio. Da bi, ipak, policija profesionalno mogla raditi svoj

posao, potrebna im je podrška institucija ali i građana.

Koliko je reforma policije potreba, a koliko je to političko pitanje?

- Sa stanovišta profesionalnog rada policije reforma je potrebna u zajedničkoj borbi protiv svih vrsta kriminala, ali, nažalost, dobija političke dimenzije.

Ko je kriv što krivične prijave sve češće padaju na sudu?

- Istrage nisu prosto računanje gdje je rezultat neizvjestan. Nažalost, ako predmeti - slučajevi imaju političku pozadinu, imaju više šanse da se ne riješe.

Više je razloga za to. Neki od njih su: sudovi prilikom izricanja kazni najčešće izriču donji minimum zapriječanih kazni, optužnice nisu pripremljene dobro, nisu kvalitetno zastupljene, u velikom broju tužioc ne ulažu žalbe na prvostepe-

ne presude...

Da li je bilo neophodno produžiti pritvorski period sa jedne na tri godine kroz izmjene i dopune Krivičnog zakona i Zakona o krivičnom postupku?

- Izmjene i dopune Zakona o krivičnom postupku u BiH, po kojem se produžava maksimalan pritvorski period nakon podizanja optužnice sa jedne na tri godine za najteže slučajeve, visoki predstavnik je donio na zahtjev relevantnih bh. institucija koje su kompetentne i znaju koje je optimalno vrijeme za kompleksne predmete.

Koliko je to opravdano? Šta ako se desi da neko provede u zatvoru tri godine i istraga pokaže kako on nije kriv? Morate priznati da je njegov život uništen.

- Da, svakako. U principu, mislim da se događa rijetko. Vrijeme pro-

vedeno u pritvoru, razdvojenost od porodice i bliskih ljudi, izolacija, sasvim sigurno ostavlja posljedice na njihovo psihofizičko stanje, koje se ničim ne može ispraviti. Kako se radi o licima koja su u toku postupka fizički i psihički oštećena, imaju pravo na nadoknadu nematerijalne štete, što predstavlja moralnu satisfakciju za navedena lica, i mali dio nadoknade izgubljenog.

Učestvovali ste u Radnoj grupi za izradu Zakona o sprečavanju nereda na sportskim takmičenjima u BiH. Šta očekujete od tog Zakona?

- Odrasla sam u općini Centar, u vremenu kada se na utakmicu ili bilo koji sportski događaj išlo sa radošću. Roditelji mlađu djecu sada nerado vode na stadione, jer je prisutno nasilničko ponašanje, huliganstvo, vandalizam koji plaši. Mada je u susjednim zemljama ozbiljnije stanje nego u BiH. Ovaj Zakon nedostaje u BiH, i pomoći će da se razlikuju huligani od navijača, i da ljubitelji sporta, naročito najmlađi, mogu ići sa zadovoljstvom na sportski događaj.

Koliko će tu pomoći samo donošenje zakona? Koje su to mjere koje biste Vi uveli na sportskim borilištima?

- Donošenje zakona je potreba jer će prevenirati vandalsko ponašanje pojedinaca i grupa na sportskim terenima, sankcionirati i korigovati lica koja prave izgrede. Donošenje zakona je jedan segment. Potrebna je veća kontrola lica na ulasku, radi sprečavanja unošenja svega što može povrijediti ili izazvati nered (pirotehnička sredstva, alkohol, narkotička sredstva, transparente uvredljivih sadržaja i slično), kontrola rada ugostiteljskih objekata u blizini sportskog terena (zabrana točenje alkohola dva sata prije i poslije sportskog događaja), pojačane kontrola dolaska i odlaska na manifestacijama sa povećanim rizikom, pojačana kontrola u saobraćaju, naročito javnom saobraćaju, što traži rad ne samo nadležnih za sigurnosno-bezbjedonosno stanje, javni red i mir, već i drugih institucija - javnih preduzeća, inspeksijskih, komunalnih službi...

Koliko je efikasna kazna zatvora i koliko utiče na porast kriminala?

- Zatvor je jedna od najstarijih ka-

zni, predviđena za lica koja su se drznula da pređu granicu dozvoljenog i time oštete lica, njihovu imovinu i društvo.

U BiH postoji 14 kazneno-popravnih zavoda, u kojima boravi oko 2.500-3.000 lica. Poznata je preopterećenost KPZ-a. Poznati su problemi koji prate rad ovih ustanova, gdje se nije u mogućnosti voditi računa o strukturi zatvorenika (osim pritvorenika i zatvorenika koji su u nadležnosti Ministarstva pravde BiH, gdje se prava poštuju i u skladu su sa standardima). Nije rijedak slučaj da su zajedno smješteni osuđenici na dugotrajne zatvorske kazne i maloljetni delinkventi; prisutan je problem smještaja žena; ovisnika i drugih lica sa posebnim potrebama; osoba kojima je izrečena mjera sigurnosti obaveznog psihijatrijskog liječenja. Sve to svakako usložnjava rad KPZ-a, negativno utiče na ostvarivanje prava zatvorenika koja su propisana međunarodnim konvencijama. Sigurnost boravka lica je teže ostvariti, što negativno utiče na kvalitet tretmana, proces resocijalizacije i rehabilitacije.

U takvoj organizaciji KPZ-a, kao penolog smatram da kazna zatvora kao vrste krivičnopravnih sankcija neće postići onu svrhu koju bi trebala da ima: preventivni uticaj na druge, da poštuju pravni sistem i ne učine krivična djela; sprečavanje počinioca da učini krivična djela i podsticanje njegovog preodgoja u cilju odustajanja od činjenja krivičnih djela. S pravom možemo reći da odsustvo, nepotpunost i neefikasnost postpenalne zaštite, predstavlja kriminogeni faktor koji bi trebao biti integralni dio politike suzbijanja kriminaliteta svake države u cilju smanjenja povrata u kriminal i rada na prevenciji kriminaliteta.

Da li se poštuju ljudska prava lica koja se nalaze u zatvorima i treba li ih unaprijediti?

- U principu i u uslovima u kojima rade penološke ustanove u BiH, mislim da se poštuju,

što ne znači da ne postoje i kršenja ljudskih prava, ali smatram da je to rijetka pojava.

Smatram da treba postojati i funkcionisati zatvorska inspekcija, na državnom nivou, nepristrasna, profesionalna, koja će u potpunosti biti neovisna od uprave penoloških ustanova. Prioritet je rad zatvorskog ombudsmena za ljudska prava, naročito unapređenje odgovaranja na žalbe zatvorenika, sa jasnim i opširnim obrazloženjima i dr.

Smrtna kazna, pitanje o kojem se malo razgovara?

- Na ovim prostorima dešavanja zadnjih godina, rat, poratno vrijeme, tjeraju mnoge na razmišljanja i razgovor o tome da li treba ukinuti smrtnu kaznu. Ako se isključi vjerski aspekt, postoje različita mišljenja.

Naprimjer, u većini američkih zemalja gdje su na cijeni poštovanje ljudskih prava i sloboda, na snazi je smrtna kazna (sada i za seksualne zločine, npr. Oklahama, Južna Karolina, Luizijana, Florida, Montana) dok je u Evropi trend za ukidanjem.

Smatram da je dugotrajna kazna, izolacija lica koja su počinila najteža krivična djela, sasvim dovoljna, ali da za to i postoje posebne penološke ustanove ili uređene na način kako to sada nije slučaj.

Primjena Krivičnog zakona kada je u pitanju sigurnosna mjera obaveznog psihijatrijskog liječenja često nije adekvatna. Šta se tu može napraviti?

- Uglavnom, prema Krivičnom zakonu, bez obzira o čijem pravosudnom sistemu je riječ, pa i u BiH, sprovedba izrečene sigurnosne mjere obaveznog psihijatrijskog liječenja usložnjava i utiče na sigurnosno-bezbjedonosnu situaciju.

U BiH je usložnjena situacija kada je ova populacija zatvorenika u pitanju. Potrebno je da forenzičko odjelje-

nje za mentalno oboljele osuđenike bude opremljeno kako je određeno prema standardima i potrebi korisnika.

Zaštita osoba s duševnim smetnjama bi se efikasnije sprovodila ukoliko bi postojala kvalitetnija saradnja koja je i obavezujuća, između kazneno-popravnih zavoda, da pravovremeno šalju informaciju o kretanju ovih lica van KPZ-a.

Možete li to pojasniti?

- Kordinacija nadležnih institucija, pravovremena informacija (centri za socijalni rad, ministarstva unutrašnjih poslova i dr). Zaštita i sigurnost prvenstveno žrtava i njihovih porodica, ali i svih građana, je ugrožena kada ova lica izlaze iz zatvora. Ovo je važno pitanje, teško se ostvaruje u praksi, bez obzira na sva nastojanja nadležnih, potrebno je obratiti pažnju na njeno kvalitetnije rješavanje.

Šta predlažete kako bi se stanje popravilo?

- Potrebno je raditi na primarnoj prevenciji; izmijeniti sistem kažnjavanja od prvih prekršaja; ojačati i sprovoditi alternativne sankcije u oblasti društveno-korisnoga rada za počinioca lakših krivičnih djela, ona lica koja su odslužila veći dio zatvorske kazne i lica koja svojim ponašanjem u penološkoj ustanovi pokazuju da je zatvorska kazna postigla onaj cilj koji prvenstveno ima, i da su spremni za rehabilitaciju i resocijalizaciju mimo zatvorskih zidova.

U penološkim ustanovama treba da budu samo oni kojima je zaista tamo mjesto, koje u određenom vremenu treba dijelom izolirati iz društvene zajednice, a to su počinioci teških krivičnih djela, i recidivisti; potrebno je ojačati sistem uslovnog puštanja na slobodu; potrebno je što prije proširiti kapaciteta KPZ-a, i graditi nove; osigurati kontinuitet radnog angažmana osuđenih osoba, naročito osuđenih pri premještanju iz jednog KPZ-a u drugi KPZ; ujednačiti kriterij za dodjelu vanjskih pogodnosti; sprovoditi kontinuiranu edukaciju osoblja (pozitivan primjer svakako je rad Udruženja penologa FBiH, Federalnog ministarstva pravde); potrebno je što prije izgradnja državnog zatvora, kao i usvajanje tj. sprovedba državne strategije pravosuđa. ■

Smatram da treba postojati i funkcionisati zatvorska inspekcija



Šest godina **traganja za** **ubicom** Suzane Simikić

Prije gotovo šest godina Suzana Simikić je ubijena pored same ceste, u pola dana, bez svjedoka. Vlada Distrikta Brčko je ponudila nagradu od 50 hiljada KM za onog ko ponudi informacije koje bi pomogle u otkrivanju ubice

PISE: **Amarildo Gutić**
FOTO: **Arhiv Starta**

Devetog maja će biti šest godina otkako je u Ražljevu, u Distriktu Brčko, na povratku iz škole ubijena **Suzana Simikić**, učenica osmog razreda osnovne škole. Pronađena je u šumi kraj puta, nekoliko stotina metara od porodične kuće. Opsežna istraga za dokazima i svjedocima koji bi istražiteljima pomogli u potrazi za ubicom ili više njih još nije dala konačne rezultate.

Tijelo djevojčice pronađeno u šumi

Kao i svakog dana i devetog maja 2001. godine **Jovo i Sara Simikić** su oko 13 sati očekivali povratak iz škole svoje mlađe kćerke Suzane. Kako do 14 sati ona nije došla, zamolili su komšinicu da telefonom obavijesti dežurnu službu Policije Brčko Distrikta o nestanku njihove kćerke. Jedan sat poslije u zgradu policije došli su otac i starija sestra Suzane Simikić kako bi i lično prijavili njen nestanak. Suzani nije bilo svojstveno da toliko kasni. Strah porodice, po-



Suzana Simikić je bila isuviše mlada djevojka da bi postojao neko ko bi želio da joj se osveti

kazaće se bio je opravdan...

Policijske patrole su počele potragu dionice od autobusnog stajališta gdje je Suzana izašla iz autobusa prema kući udaljenoj oko 600 metara. Potrazi su se pridružili i mještani. U 16 sati i 15 minuta, dvije stotine metara od ceste, na sredini puta od stajališta prema njenoj kući, u šumi je pronađeno tijelo Suzane Simikić. Ubijena je na svirep način, ugušenjem, sa više tjelesnih povreda.

Ubistvo petnaestogodišnje djevojke izazvalo je i strah i ogorčenje ne samo na području obližnjih naselja Distrikta Brčko. Policija i tužilaštvo Distrikta su sve raspoložive ljudske i materijalne resurse posvetile istrazi o ovom ubistvu. No, protekle godine pokazale su da je ovo iz više razloga izuzetno zamršen slučaj.

Prema rekonstrukciji kretanja, Suzana je oko podneva, nakon nastave, izašla iz osnovne škole u Ražljevu, gdje je pohađala osmi razred. Zajedno sa ostalim učenicima koji koriste

autobuski prijevoz sačekala je autobus i ušla u vozilo. Izašla je na ubičajenom stajalištu nadomak kuće. U izjavama nakon ubistva članovi porodice navodili su da ništa čudno nije bilo u njenom ponašanju, niti je ukazivala da je neko uznemirava. Posljednja koja je s njom razgovarala bila je školska drugarica. Ni ona nije primijetila bilo šta čudno u Suzaninom ponašanju.

Istraga još traje

Nakon izlaska iz autobusa Suzana je prešla put i kretala se njegovom lijevom stranom u pravcu kuće. Od stajališta do kuće cesta pravi blagu, dužu krivinu, a sa lijeve strane je gusta šuma. To je potvrdio jedan svjedok koji ju je primijetio dok je prolazio automobilom. I to je bio posljednji put da ju je neko vidio živu. Niko nije primijetio bilo kakve osobe koje su bile u blizini ili vozilo. Suzana Simikić je ubijena pored same ceste, u pola dana,

bez svjedoka. Od tada je prošlo gotovo šest godina godina.

Oko 70 hiljada KM potrošeno je samo na laboratorijske nalaze mogućih tragova koji bi ukazali na identitet počinioca. Suzana Simikić je bila isuviše mlada djevojka da bi postojao neko ko bi želio da joj se osveti. Nema saznanja ni da bi motivi ubistva bila osveta nekom od članova porodice. Tokom četverogodišnje istrage ispitanice su brojne osobe koje bi eventualno mogle ukazati na nešto ili nekog odnosno rješenje slučaja. Vlada Distrikta Brčko je ponudila i nagradu od 50 hiljada KM za onog ko ponudi informacije koje bi pomogle otkrivanju ubice. Stotine i stotine stranica zapišnika i detalja vezanih za slučaj kazuje da su istražitelji bili uporni, ali nedostaje onaj konačan dokaz da bi ovaj slučaj, tačnije okrutno ubistvo konačno bio riješeno otkrivanjem počionica. Ubica Suzane Simikić je još uvijek na slobodi... ■

Mujagić poznao ubicu

Sedamnaestog septembra 2002. godine oko 7 sati i 20 minuta u svojoj kući u zaseoku Tuke, MZ Mravići, pronađen je mrtav **Mustafa Mujagić**. Mustafa je nekoliko puta udaren u glavu, a potom je zadavljen. U svim prostorijama kuće stvari su bile ispremetane što je ukazivalo i na pokušaj pljačke. Novca, za koji se pretpostavlja da ga je ubijeni imao u većoj količini, u kući nije bilo. Uviđajem nije konstatirano oštećenje ulaznih vrata. Postoje dvije mogućnosti. Jedna je da je ubica bio osoba koja je slobodno došla do kuće i kojoj su vrata otvorena na osnovu prepoznavanja, te druga, da je ubica, koji je došao s namjerom da opljačka Mustafu, znajući da bi trebao imati novca u kući, slučajno zatekao otključana vrata te tako bez problema ušao.

Kobna potjera za kradljivcima

Osamnaestog jula 1997. godine, nekoliko sati iza ponoći, mostarsko naselje Cim bilo je poprište ubistva **Darija Džidića**. Te noći Dario je parkirao svoje vozilo, mercedes austrijskih registarskih tablica, ispred kuće gdje mu je stanovao brat. Oko 3 sata ujutro Dario je probuđen zvukom objanjanja vozila istrčao u dvorište, a potom je izašao i na put pokušavši da uhvati kradljivce. Jedan od kradljivaca je dva puta pucao iz pištolja, nakon čega je Dario Džidić pogođen jednim (rikošetiranim) metkom u grud. Gotovo deset godina nakon ovog događaja ubica i njegov saučesnik još nisu pronađeni.

Preko Bosne do zvijezda

Rute krijumčara ljudima vode i preko BiH. Ipak, u posljednje vrijeme sve su češći slučajevi presjecanja krijumčarskog lanca. Tako je dvadeset osmog marta ove godine uspješnom akcijom pripadnika Jedinice granične policije Izačić uhvaćena grupa od pet državljana Srbije u pokušaju ilegalnog prelaska državne granice na području Bugara

PIŠE: Adisa Dedić
FOTO: Arhiv Starta

Tužilaštvo BiH početkom ovog mjeseca podiglo je optužnicu za krivično djelo krijumčarenja osoba protiv **Željka Martinovića** iz Brčkog i **Ive Martinovića** iz Orašja. Prema optužnici, oni su za novčanu naknadu omogućili dvojici makedonskih državljana nezakoniti prelazak granice BiH i Republike Hrvatske. Svojim su vozilom preuzeli makedonske državljanke, primili novac i organizirali njihovo prebacivanje u Hrvatsku uputivši ih autobusom do lokacije gdje ih je sačekala nepoznata osoba i dalje predala nepoznatoj osobi u čamcu na Uni, nakon čega su ilegalno prevezeni u Republiku Hrvatsku.

Sprega srpske, bosanske i kosovske mafije

Krijumčarenje ljudi danas je jedan od najunosnijih kriminalnih aktivnosti u svijetu, a procjenjuje se da godišnje zarade iznose i do 30 milijardi američkih dolara. Primjerice, ilegalni put jednog državljanina Kine preko baltičkih zemalja do SAD košta oko 25 hiljada dolara. U jugoistočnoj Evropi oko 300.000 osoba godišnje postaju žrtve krijumčarenja. Balkan je ruta za ulazak u Evropu pa se tako i države nekadašnje Jugoslavije suočavaju s ilegalnim migracijama uglavnom kao tranzitne zemlje. I ovdje imamo dobro poznatu priču o saradnji kriminalaca svih nacija.

- **Ono što je interesantno je da su sve one strane koje su bile sukobljene tokom 90-tih godina još tada bile najveći partneri u izvozu ilegalnih migranata. Organizirane kriminalne grupe su spojile ozbiljne saveze koje je teško kontrolirati. U tome najvećeg udjela ima tzv. srpska i bosanska mafija koja se u svojim aktivnostima značajno oslanja na mafiju sa Kosova** - objašnjava Saša Mijalković, sa Policijske akademije Be-



U jugoistočnoj Evropi oko 300.000 osoba godišnje postaju žrtve krijumčarenja

ograd, inače autor knjige *Trgovina ljudima*.

Pojedinačni slučajevi, poput hapšenja dvojice Martinovića, samo su jedan mali dio u rješavanju problema trgovine ljudim. Stručnjaci smatraju kako treba uložiti mnogo više napore za regionalnu prevenciju ovog vida kriminala.

- **Mi smo svjesni da na nacionalnom planu ne možemo postići puno u borbi protiv ovog vida kriminala i iz tog razloga se uvezujemo i sa drugim susjednim zemljama i njihovim agencijama sa provođenje zakona. S takvim uvezivanjem smatramo da se možemo što učinkovitije boriti protiv ove društveno negativne pojave** - kaže **Marinko Jurčević**, glavni tužilac Tužilaštva BiH.

14 utopljenih turskih državljana

Osim što krše zakon, ilegalni migranti uglavnom ne uspiju stići do željenih destinacija. Nerijetko budu prevareni i ostavljeni u našoj zemlji misleći da su već - u Italiji!? Tako im novac odlazi u nepovrat.

Da takvih slučajeva ima potvrđuje i **Zdravko Davidović**, zamjenik zapovjednika Jedinice HUM Granične policije BiH:

- **Najčešće se za prevod preko granice po kandidatu spominje cifra od 100 eura, međutim, ima-**

mo slučaj gdje niko ništa nije platio, postojao je kanal iz Albanije prema Trstu i navodno da su oni platili 3.000 eura poslije dolaska u Italiju.

Davidović upozorava da migrant može vrlo lako postati plijen ne samo krijumčara već i trgovaca ljudima. Evidentno je to i na osnovu izjava uhvaćenih ilegalnih migranata.

- **Lica najčešće ne znaju ni gdje su došla, ni ko ih je preveo, ni kuda su pošli, uglavnom se to radi u noćnim satima, često nisu u stanju da kažu ni marku putničkog vozila kojim su prevoženi** - navodi Davidović.

Naši graničari ozbiljno su shvatili ovaj problem. Broj ilegalnih migracija od 2001., kada je uspostavljena granična služba, je smanjen. Takav je slučaj i na granici koju kontrolira Jedinica Orašje:

- **Mi smo imali slučaj kada se 14 osoba turskih državljana utopilo i to je jedan slučaj gdje smo osam bh. državljana procesuirali, tako da više nije bilo sličnih situacija** - konstatira **Zdravko Sedlo**, zapovjednik Jedinice Orašje GP BiH.

Da se ilegalne migracije u našoj zemlji pokušavaju spriječiti potvrđuje rad Granične policije. Dvadeset osmog marta ove godine uspješnom akcijom pripadnika Jedinice granične policije Izačić uhvaćena je grupa od pet državljana Srbije u pokušaju ilegalnog prelaska državne

granice na području Bugara. Tako je presječen organizirani lanac krijumčarenja osoba na tom području. U akciji je učestvovao i **Arman Midžić**, zamjenik komandira Jedinice GP BiH Izačić:

- **Kriminalističkom obradom došli smo do podataka da se radi o vodiču i izvršiocima ovog krivičnog djela. Prijavljene su četiri osobe i po nalogu državnog tužilaštva predate su Tužilaštvu BiH kao i državljanu Srbije koji će biti svjedoci o krivičnom djelu - krijumčarenje ljudi.**

Za dobru akciju graničari su spremni zahvaljujući obučeni i opremljeni za otkrivanje ilegalnih migracija. Postoje senzori - uređaji za noćno otkrivanje pješaka prilikom pokušaja prelaska granice te detektori za otkrivanje ugljendioksida u cisternama. Za sprečavanje ovog problema prioritet su i mjere edukativno - informativnog karaktera kojim bi se stanovništvo upoznao sa opasnostima i realnostima ilegalne migracije:

- **Osim toga, mjere imigracione politike morale bi postati znatno liberalnije** - kaže naš sagovornik iz Beograda Saša Mijalković.

Budući da su razlozi za migracije isključivo ekonomske naravi, mnogi smatraju kako će eventualna integracija u Evropu dugoročno biti ključ rješavanja tog problema. ■

Huligani, nasmiješite se

Najagresivnijim navijačima, koji često prave incidente, niko ne može zabraniti dolazak na utakmice. Sportske događaje nižeg ranga obično obezbjeđuju dva do četiri policajaca dok utakmice visokog rizika zna obezbjeđivati i 200 policajaca uz podršku specijalnih policijskih jedinica. Ipak, sve to bez zakona ne može biti efikasna borba protiv huliganizma

PISE: Ekem Tinjak
FOTO: Arhiv Starta

Nemile navijačke scene - česta je rečenica koju u posljednjih nekoliko godina sportski komentatori i novinari u BiH odašilju u javnost. To podrazumijeva da su navijači s tribina utrčali u stadion i preuzeli zakon u svoje ruke, ili su u gradu gdje gostuje njihov tim polupali izloge prodavnica, ili su se sukobili s policijom... Nedavno je sudija **Ante Živković**, na utakmici Prve nogometne lige FBiH između *Toška* i *Zvijezde*, jedva izvukao živu glavu bježeći od pobjesnijih navijača. Iza leđa policajaca sudija **Edin Golač** tražio je spas kada su navijači *Veleža* (*Red Army*) utrčali na teren nakon utakmice *Velež - Jedinstvo*. Na stadionu u Lukavici, na utakmici između *Slavije* i *Željezničara*, navijači gostujućeg tima nisu dočekali kraj. Policija ih je ranije s tribina otpratila prema Sarajevu. Ali dok su napuštali stadion sukobili su se s policajcima... Lista ovakvih slučajeva na bh. terenima zaista je dugačka.

Od 2 do 200 policajaca

Policija se jedino suprotstavila nasilnicima i za sada se dobro nose sa ovim problemom. Ipak bez adekvatne zakon-



Borba protiv huliganizma prepuštena policiji

ske regulative i mjera koje su neophodne u prevenciji nasilja, pitanje je kada će doći do ozbiljnih problema.

Ono što većina evropskih država odavno ima, BiH nema. Dakle, nema zakonskih propisa o vođenja dosjea za najekstremnije navijače, niti izricanja mjera zabrane prisustovanja sportskim događajima.

- **Uprava policije MUP-a USK nema formirane dosjee o osobama koje često izazivaju incidente na fudbalskim utakmicama** - kažu portparol MUP-a USK **Ale Šiljdedić**.

U MUP-u KS i TK kažu da raspoložu podacima o mogućim nosiocima incidentnih situacija, ali dodaju da nemaju zakonske mogućnosti za formiranje i vođenje dosjea. Zahvaljujući nepostojanju zakonskih odredbi, navijačima koji često prave incidente niko ne može odrediti mjeru zabraniti dolaska na utakmice. Istina je da je Kanton Sarajevo usvojio Zakon o sprečavanju nasilja i nedoličnim ponašanjima na sportskim priredbama, koji se dotiče vođenja evidencije i izricanja zabarne incidentnim osobama, ali...

Država protiv huligana

Grčka vlada poduzima drastične mjere kako bi suzbila huliganizam i sukobe navijača na sportskim događajima, a posljednja u nizu je zakonska zabrana klubova navijača. Nakon što je nedavno prekinuto održavanje svih profesionalnih sportskih događaja u Grčkoj, ovom mjerom, koja je stupila na snagu, zabranjeno je djelovanje oko 300 organiziranih klubova navijača, uglavnom nogometnih klubova. Povod je nedavni sukob navijača dvaju atenskih klubova, *Olimpiakosa* i *Panathinaikosa*, uoči ženske odbojkaške utakmice, u kojem je jedan navijač poginuo, a nekoliko teško ozlijeđenih ostalo je ležati na ulicama.

- **Taj zakon još nije službeno objavljen, znači nije primjenjiv** - kažu u MUP-u KS.

Kako je to u susjedstvu možda najbolje pokazuju pripreme policajaca pred nedavno održani meč između *Dinama* i *Hajduka* u Zagrebu.

- *Pred sutrašnju utakmicu na stadionu u Maksimiru bit će angažirano više od 800 policajaca i 430 redara i zaštitara. Načelnik zagrebačke policije Marijan Tomurađ najavio je da će se već od večeras pojačano nadzirati gradske ulice. Za ovu utakmicu zabranu dol-*

Zadavio nevjenčanu suprugu i prijavio se policiji

Dragoljuba Vraneševića iz Omarske inspektor Stanice javne bezbjednosti Prijedor uhapsili su zbog sumnje da je ubio nevjenčanu suprugu **Gospavu Gavrilović** u njihovoj kući u mjestu Omarska kod Prijedora. Vranešević se sam prijavio u Policijsku stanicu Omarska rekavši pri tom kako se svađao sa nevjenčanom suprugom a potom i fizički obračunao, nakon čega je ona ostala da leži na podu. Policajci prijedorske Stanice javne bezbjednosti su obavili uviđaj. Tijelo Gavrilovićeve je zatečeno u ležećem položaju, sa vidnim povredama glave i vrata. Uviđaju je prisustvovala i dežurna liječnica a konstatirano je kako je Gavrilovićeve udavljena rukama.

Vranešević je uz izvještaj o počinjenom krivičnom djelu predat u nadležnost Tužilaštva gdje je i saslušan a naloženo je i obavljanje obdukcije tijela Gospave Gavrilović.


Sedam dana prije ovog slučaja u Prijedoru se desilo još jedno slično ubistvo kada je **Zoran Miladinović** 28. marta rukama zadavio majku **Jovanku**.

Baćena bomba na Camel

Nepoznata osoba bacila je eksplozivnu napravu ispred diskoteke *Camel* u Sanskom Mostu, vlasnika **S.Š.** Epilog ovog bombaškog napada je jedna mrtva i jedna ranjena osoba. **I.N.**, rođen 1961. godine u Sanskom Mostu, gdje je bio i nastanjen, preminuo je u bolnici u Prijedoru, dok je drugi **V.E.** rođen 1986. godine u Prijedoru, nastanjen u Sanskom Mostu, zadobio teže povrede i nalazi se van životne opasnosti.


Kantonalni tužilac zajedno s inspektorima kriminalističke policije MUP-a izvršio je uviđaj i konstatirano je da se radi o krivičnom djelu ubistva, a u vezi s krivičnim djelom izazivanje opće opasnosti.

Prilikom eksplozije pričinjena je i materijalna šteta na više vozila koja su se nalazila ispred *Camela*. Istraga je u toku.



se - snimamo vas!

U HNK se stvaraju dosjei



jski- FK Velež obezbjeđuje 500 policajaca.

- **Prema mišljenju policije, sadašnje mjere su dobre ali ih treba primjenjivat na cijelom prostoru BiH kvalitetnije i profesionalnije, kako bi na terenima pobijedio sportkaže Zdravko Žilić**, načelnik Operativnog centra MUP-a HNK.

Iako zakon daje mogućnost zabrane posjećivanja sportskih događaja od godinu dana za navijače - huligane, u HNK do sada nikome nije izrečena ta mjera.

Hercegovačko-neretvanski kanton ima Zakon o sprečavanju nereda na sportskim natjecanjima. Prema tom zakonu već su u izradi dosjei izgređenika sa fotoalbumima. U 2006. godini zbog narušavanja javnog reda i mira na sportskim terenima na području HNK procesuirane su 23 osobe, a u prva tri mjeseca ove godine tri. Zanimljivo je i da susret HŠK Zrin-

aska ima 19 navijača Dinama BBB-a i 13 navijača Hajduka – Torcidaša – stajalo je u novinskoj vijesti.

Utakmice, pogotovo fudbalske, u BiH obezbjeđuje od dva do nekoliko stotina policajaca. To zavisi od procjene organizatora. Sportske događaje nižeg ranga obično obezbjeđuju dva do četiri policajaca dok utakmice visokog rizika zna obezbjeđivati i 200 policajaca uz podršku specijalnih policijskih jedinica.

- **Procjena stepena rizika odigravanja neke utakmice zavisi prije svega od procjene sportskog saveza i organizatora, od broja očekivanih gledalaca, informacija o prisustvu gostujućih navijača i kojoj kategoriji pripadaju, te da li postoji animozitet između navijačkih skupina i iskustva iz ranijih utakmica** – kažu u MUP KS.

Zakoni evropskih zemalja

Od početka ove godine u MUP-

u Sarajevo samo u jednom slučaju podnesen je zahtjev za pokretanje prekršajnog postupka zbog narušavanja javnog reda i mira jednog lica, a nakon utakmice *Butmir - Slavija*. U USK u ovoj godini nakon utakmice *Jedinstvo - Sarajevo* privedena su četiri maloljetnika koji su kamenovali autobus gostujućih navijača i tri lica sa područja Velike Kladaše koja su izazvala incidente na sportskom događaju. UTK nisu priveli niti jednu osobu u ovoj godini koja je narušavala javni red i mir na sportskim terenima. Nakon nereda tokom fudbalske utakmice Premijer lige BiH između *Slavije* iz Istočnog Sarajeva i *Željezničara*, protiv dva navijača *FK Slavije* nadležnom tužilaštvu podnesen je izvještaj o kivičnom djelu nasilničko ponašanje. Trojici navijača izdat je prekršajni nalog zbog prekršaja iz oblasti javnog reda i mira.

Zakon o policijskim službenicima

dao je ovlasti da policija u cilju sprečavanja krivičnih djela, prekršaja i remećenja javnog reda i mira, koristi audio i video snimanje na javnim mjestima. Ali i tu je situacija na području BiH raznolika i vezana je čisto za materijalnu bazu.

- **MUP snima u zavisnosti od materijalno-tehničkih sredstava kojima raspolaže. Ali, obaveza je da se na utakmicama visokog rizika snimaju tribine i grupe navijača** - kaže **Ljubomir Divković**, načelnik PU Tuzla.


Ipak, bez obzira na angažman, u MUP-ovima smatraju da postojeće zakonske odredbe vezane za huliganizam treba hitno mijenjati ili da one nisu dovoljne.

- **Zakonske odredbe koje imaju neke od susjednih zemalja kao i zemlje zapadne Evrope bi se uz određena prilagodbe našim uslovima mogle efikasno primjenjivati i sigurno poboljšati stanje u ovoj oblasti** – kaže Divković.

U MUP-u KS smatraju da je potrebno donijeti zakon o sprečavanju nasilja i nedoličnog ponašanja na sportskim terenima na nivou F BiH i BiH, jer se rizične utakmice uglavnom organiziraju u sklopu sportskih saveza entiteta i države. Pored toga, naglašavaju da bi zakonom trebalo regulisati mnoga pitanja kojima bi se nasilje i nedolično ponašanje na sportskim terenima sankcionisalo, a i sportski savezi i organizatori obavezali na postupanje koje će tome doprinijeti. ■

Najgluplji kriminalci

Kreditnom karticom platio zatvor



Jedan njemački lopov pokušao je provaliti u komšijinu kuću uz pomoć kreditne kartice. Na njegovu žalost, kartica je pukla a dio na kojem je pisalo njegovo ime je zaglavio u vratima.

Pokušao je imitirati ono što je vidio na televiziji ali se vlasnik stana probudio i otjerao lopova, izjavio je glasnogovornik policije u Moenchengladbachu i dodao da ih je vlasnik stana nazvao i pročitao podatke o lopovu.

Policija je u kući lopova pronašla drugi dio kartice.

Poštovani sudija, nije pištolj nego kokain


Osumnjičeni za posjedovanje droge **Christopher Johns** na suđenju u američkoj državi Michigan izjavio je da ga je policajac nelegalno pretražio jer nije imao nalog. Kada mu je tužitelj objasnio kako policajcu nije trebao nalog jer je izbočina u njegovoj jakni podsjećala na pištolj, Johns je izjavio da je to besmislica. Ispostavilo se da Johns nosi istu jaknu u kojoj je uhapšen pa ju je dodao sudiji da ga uvjeri da je policajac bio u krivu. Sudija je otkrio paketić kokaina u spornom džepu. Napravio je pauzu od pet minuta prije nastavka suđenja jer nije mogao suzdržati smijeh.

Organizirane automafije i trgovina drogom najveći problemi policijama u BiH

Na okruglom stolu o temi *Borba protiv organiziranog kriminala*, nedavno održanom u sarajevskom hotelu *Holiday Inn*, najavljeno je da će ova godina biti prekretnica u sprečavanju djelovanja automafije što je, poslije trgovine drogom, najveći problem u BiH. Istaknuo je ovo, između ostalih, **Adi Biser**, savjetnik za organizirani kriminal u Interpolu dodavši da kriminalci ne poznaju nacionalne granice i da su uvijek korak ispred onih koji se bore protiv njih. Događaju organiziranom povodom predsjedavanja BiH Jadransko-jonskom inicijativom (JJI) prisustvovali su predstavnici policijskih agencija zemalja učesnica inicijative, EUPM-a i Interpola.

Iz Ministarstva sigurnosti BiH rečeno je da BiH sa susjednim zemljama uspješno radi na razbijanju lanca organizirane trgovine drogom, krađe automobila, krijumčarenja cigareta i drugih visokotarifnih roba, što je potvrdio i **Anto Rajkovača**, šef Odjela za organizirani kriminal MUP-a Hrvatske.

O dobroj saradnji sa Slovenijom, Hrvatskom, Srbijom, Crnom Gorom i ostalim zemljama koje su uključene u *balkansku rutu* govorio je zamjenik direktora DGSBiH **Vahid Alagić**, naglasivši posebno dobre rezultate kada su u pitanju ilegalne migracije i krijumčarenje ljudi.



Zbog sumnje u izvršenje više kaznenih djela

TRAŽE SE



Dino Menzilović
(1970) iz Zenice



Vjekoslav Glavurda
(1985) iz Travnika



Dževad Hazić
(1973) iz Zenice



Frano Šoljo
(1975) iz Travnika

Mole se svi građani koji primijete ove osobe da odmah obavijeste
Federalnu upravu policije (tel: 033 261 300) ili najbližu PS (122)

VAŠA POLICIJA

